

Sulat I Pablo Tun Ta Mga Taga Efeso

Una Basan

Sayyan tuu dakál tō lunsud ka Efeso, asta igóddóan ka marapung manubù. Ágkabantug tō mga taga Efeso su ágkaduwánnan sikandan. Duwán dakál simbaan na ágpangadapan dan katô ágmanaman na ágngadanan si Diana. (Ahaán tō Lumu 19:21-41.)

Dalám ka tállu ámmé igóddô si Pablo tun ta Efeso, asta marapung tō iga paminág katô igulit-ulit din tingód ki Jesu-Cristo. Duwán mga kasalábbuan na igimu i Pablo, asta marapung tō iga pamaké ki Cristo. Pángnga ka tállu ámmé iga panó si Pablo tun ta duma mga lunsud.

Tō igpriso si Pablo tun ta lunsud ka Roma, igsulat din ni tun ta mga ágpampamaké na góddô tun ta Efeso asta tun ta mga duma lunsud na madani tun ta Efeso.

Nit sulat din, igulit din na iga pasábbadé dán tō mga ágpampamaké ukit katô kapasábbad dan tun ki Jesu-Cristo. Marapung tō mga panunggiringan na iggamit i Pablo tingód kani. Mà din, sikandan tō iring na lawa asta si Cristo tō iring na ulu. Sikandan tō iring na balé, asta si Cristo tō iring na masarig batu na ágpónsadanan ka balé. Sikandan tō iring na sawa, asta si Cristo tō iring na duma.

Igsulat din pagsik tō tingód katô madigár ágkémun dan asta tō tingód katô kapanalu dan ki Maibuyan.

¹ Sakán si Pablo na inému apostoles i Jesu-Cristo tingód katô kakalyag ka Manama. Ágpangumusta a ákniyu diyan ta lunsud ka Efeso. Sikiyu tô mga sakup ka Manama asta ágkasarigan kó na igpasábbad tun ki Jesu-Cristo.

² Mólà pa ka tabangan kó ka Manama asta bággayan kó katô kasunayan tikud tun ta Manama na Ámmà ta asta tikud tun ta Áglangngagán na si Jesu-Cristo.

Mga kadigárran na ágbággén i Cristo áknita

³ Durungán ta gó sikandin na Manama asta Ámmà katô Áglangngagán ta na si Jesu-Cristo! Igbággé ka Manama áknita tô langun kadigárran na tikud tun ta langit su igpasakup ki tun ki Cristo.

⁴ Sayyan tô ándà pa imuwi ka Manama ni banuwa, taganà kid igsalin ikandin ébô imun ki na malinis asta ándà salà tun ta saruwan din tingód katô kapasábbad ta tun ki Cristo. Tingód katô dakál ginawa katô Manama áknita, ⁵ taganà dán duwán plano din na imun ki ikandin na mga gabatà din ukit katô iglumu i Jesu-Cristo, su ni gó tô ágdantulán katô kakalyag din. ⁶ Purisu durungán ta gó tô Manama su igtábbus ki ikandin tingód katô tuu dakál ginawa na ighbággé din áknita íring na gasa ukit katô kapasábbad ta tun ta Batà din na ágginawaan din!

⁷ Ukit katô dipanug i Cristo tun ta kamatayan din tun ta krus, igtábbus kid katô Manama asta igpasinsiyaan din dán tô mga salà ta tingód katô tuu dakál kédu din áknita. ⁸ Mabasa sikandin asta ighbággayan ki ikandin ka kapandayan asta kagpáttan. ⁹ Ukit kani, igpasóddór ka Manama

áknita tō plano din na ándà din pasóddóri sayyan na tumanán din ukit ki Cristo. ¹⁰ Ni gó tō igplano din. Ka dumunggù dán tō nángngà álló, pasábbadán din tō langun-langun na igimu din, agad tun ta langit ó nit banuwa, asta pasakupán din tun ta pagpangulu i Cristo.

¹¹ Agad ándin tō plano asta kakalyag katô Manama, tō gó tō ágkatuman. Tun ta katigkanayan tō ándà din pa imuwi ni banuwa, taganà duwán plano din na salinán ké ikandin ébô imun ké na mga sakup din ukit katô kapasábbad dé tun ki Cristo, ¹² su sikami na mga Judio tō una igiman asta igpamaké ki Cristo. Igsalin ké katô Manama ébô durungán asta pabantugán sikandin ukit áknami. ¹³ Sikiyu pagsik na mga ánnà Judio, tō igdinág yu tō kabánnalan na Madigár Gulitán tingód katô makatábbus ákniyu, igpamaké kó ki Cristo. Purisu igpóddô ka Manama diyan ákniyu tō Ugis Espiritu na igtandô din, su tō gó tō pató na mga sakup kó ka Manama. ¹⁴ Su igpóddô din dán tō Ugis Espiritu dini áknita, isóddóran ta na bággayan ki gó katô langun na igtandô ka Manama. Purisu isóddóran ta na igtábbus ki gó langun ikandin ébô imun ki na mga sakup din. Ukit áknita durungán asta pabantugán tō Manama.

Dasalán i Pablo tingód katô mga taga Efeso

¹⁵ Na, tuu gó madigár ni igimu ka Manama. Purisu tikud tun ta kadinág ku tingód ka kapamaké yu katô Áglangngagán na si Jesus asta tingód ka ginawa yu katô langun sakup ka Manama, ¹⁶ inalayunna gó ágpasalamat tun ta Manama tingód ákniyu. Inalayunna ágdasal para ákniyu.

17 Ágdasalla tun ta Manama na matulus Ámmà katô Áglangngagán ta na si Jesu-Cristo ébô ukit katô Ugis Espiritu bággayan kó ikandin katô kapandayan asta kagpáttan ébô tuu kó makasóddór katô Manama. **18** Ágdasalla na imun din mappawà tô panámdám yu ébô kasóddóran yu ka ándin tô gimanan tun ta pagtawar din ákniyu. Mólà pa ka kasóddóran yu na tuu madigár tô ágpulusán na igtandô ka Manama katô langun sakup din. **19** Kakalyag ku na kasóddóran yu na tuu gó matulus tô Manama na ágtabang áknita na ágpamaké kandin. Ni katulusan din **20** tô iggamit din tô iganté din puman si Cristo asta tô igaponsad din sikandin dadan tun ta kawanan din* tun ta langit. **21** Purisu si Cristo tô ágpangulu katô langun, agad ándin tô duwán katulusan ó ágpangulu ó ágharì tun ta langit, su tô ngadan na ighbaggé tun ki Cristo tuu pa mallayat ka tandingán katô langun ka duma mga ngadan, agad áknganni ó agad pa tun ta tapuri álló. **22** Igpasakup katô Manama tô langun-langun tun ta pagpangulu i Cristo, asta igimu din sikandin na ágpangulun katô langun ébô katabangan ki na mga ágpampamaké. **23** Si Cristo tô ulu katô langun ágpampamaké na igpanunggiringan katô lawa din. Su igpasakup ki tun kandin, ándà dán kulang dini áknita, su tingód katô pagpangulu din katô langun, ándà kulang agad tun datas ta langit ó nit banuwa.

2

Manté dán tô mga igpasábbad tun ki Cristo

* **1:20** 1:20 Tô munsad dadan tun ta kawanan katô ágpangulun, tô gó tô mabantug, asta mému pagsik mangulu.

¹ Dángngan, tō ándà kó pa pamaké ki Cristo, inaté kó* tun ta saruhan ka Manama su marapung gó tō mga salà yu. ² Dángngan igtuman kó katô madat ágkémun ka mga manubù nit banuwa na dì ágpamaké. Igbánnal kó ki Maibuyan na harì katô mga madat espiritu tun ta kawang-awangan. Sikandin tō espiritu na ágpid katô langun manubù na dì ágbánnal katô Manama. ³ Tō gó tō ágkémun katô langun ta dángngan, su agad ándin tō madat kakalyag ka panámdám ta asta lawa ta, tō gó tō ágtumanán ta. Su tō gó tō ágkémun ta, supakan ki pád katô Manama iring katô langun duma na dì ágpaminág kandin.

⁴ Asal dakál gó tō kédu katô Manama áknita, asta dakál gó tō ginawa din áknita. ⁵ Agad inaté ki tun ta saruhan ka Manama su ikasalà ki, asal iganté ki puman ikandin duma ki Cristo. Igtábbus ki ukit dád katô dakál kédu ka Manama. ⁶ Tingód katô kapasábbad ta tun ki Jesu-Cristo, iganté ki puman ka Manama duma ki Cristo asta igpónsad ki ikandin duma ki Cristo tun ta langit ébô mangulu ki duma kandin. ⁷ Tō gó tō igimu ka Manama para áknita ébô pakitanán din ka ándà ágtamanán na dì katáppángngan tō dakál kédu din asta kadigárran din áknita ukit katô iglumu i Jesu-Cristo. ⁸ Tingód katô dakál kédu ka Manama, igtábbus kó ukit ka kapamaké yu ki Cristo, asal ánnà ni ukit katô lumu yu, su ni gó ni gasa ka Manama ákniyu. ⁹ Tō igtábbus ki ikandin, ánnà kasulì din katô madigár linumuwan ta. Purisu ándà gó palang manubù

* **2:1** 2:1 Iring na inaté dan su madiyù dan tikud tun ta kakalyag ka Manama.

na makapadadurung tun ta saruwan ka Manama.
10 Tingód katô kapasábbad ta tun ki Jesu-Cristo, igpamantu ki katô Manama ébô makalumu ki katô madigár na igplano din sayyan para áknita.

Igpasábbadé dán tô langun ta ukit katô iglumu i Cristo

11 Na, yakó ágkalingó na tingód katô kapamasusu ákniyu, ánnà kó Judio. Ágkaringasaan kó gó katô mga Judio su ándà kó tupuwi iring kandan na igtupuwan. Tô gó tô áglumun ka manubù tun ta lawa dan, asal ándà gó ágpulusán tun ta pusung dan. **12** Dángngan ándà sinóddóran yu tingód ki Cristo. Madiyù kó tikud tun ta mga manubù na igsalin ka Manama. Ándà kó kasakup tun ta mga manubù na igtandóan ka Manama. Ukit katô ágkémun yu nit banuwa, ándà gó gimanán yu na madigár, asta ándà sóddór yu katô Manama. **13** Asal áknganni igpasakup kód tun ki Jesu-Cristo. Agad madiyù kó tun ta Manama dágngan, asal áknganni igpid kód ka Manama tun ta madani din ukit katô dipanug i Cristo na inaté tun ta krus. **14** Ukit katô kamatayan i Cristo, duwán dán kasunayan ta, asta igpasábbadé dán tô mga Judio asta tô mga ánnà Judio, su igpandà gó i Cristo tô kapósigé ta na iring na labat tun ta tángngaan katô mga Judio asta katô mga ánnà Judio. **15** Ukit katô kamatayan i Cristo igpandà din tô mga sugù na kailangan tumanán katô mga Judio, su kakalyag din na pasábbadán din tô mga Judio asta tô mga ánnà Judio ukit ka kasakup din katô langun ébô mandà tô kapósigé dan. **16** Purisu iring na sábbad dán lawa tô mga Judio asta tô mga ánnà Judio. Ukit katô kamatayan

i Cristo tun ta krus, igpandà din dán tō kapósigé ta, asta igpasábbad kid ikandin tun ta Manama. ¹⁷ Tō igdunggù si Cristo, igulit-ulit din tō Madigár Gulitán tingód ka kasunayan. Tō gó tō igtinurù din ákniyu na mga ánnà Judio na madiyù tun ta Manama, asta igtinurù din pagsik áknami na mga Judio na madani tun ta Manama. ¹⁸ Tingód katô iglumu i Cristo, agad Judio ó ánnà Judio, tō langun ta makapadani dán gó tun ta Ámmà ta na Manama ukit ka tabang katô Ugis Espiritu.

¹⁹ Purisu sikiyu na mga ánnà Judio, ánnà kód iring na ássa manubù na tikud tun ta madiyù, su igpasábbad kód gó tun ta mga sakup ka Manama. Inému kód gó na pamilya din. ²⁰ Tō langun ta na mga ágpampamaké tō iring na mga bahin katô balé na gimun ka Manama. Tō mga apostoles asta tō mga propeta ka Manama tō iring na mga sumbál katô balé, asta si Jesu-Cristo tō iring na masarig batu na ágpónsadanan katô balé. ²¹ Si Cristo tō igtágù katô tagsábbad-sábbad áknita tun ta balé din ébô imun ki ikandin na ugis templo para katô Áglangngagán. ²² Sikiyu na mga ánnà Judio na igpamaké pagsik ki Cristo, igpasábbad kó ka Manama tun áknami na mga Judio ébô imun ki na góddóan katô Manama ukit katô Ugis Espiritu din.

3

Plano katô Manama para katô mga ánnà Judio

¹ Sakán si Pablo tō igpriso su ágsuguánnánnna i Jesu-Cristo ébô mulit-ulitta ákniyu na mga ánnà Judio. ² Isóddóran yu gó na tingód katô kédu ka Manama kanak, igimuwa ikandin na ágsuguánnán

ébô tabangan ku sikiyu na mga ánnà Judio. ³ Igpasóddór katô Manama kanak tô plano na ándà din pasóddóri sayyan. Igsulatta ka mabbabà dâd tingód kani. ⁴ Atin ka basan yu tô igsulat ku, kagpáttan yu tô isóddóran ku tingód katô plano ka Manama na ándà din pasóddóri sayyan na tumanán din ukit ki Cristo. ⁵ Agad ándà pasóddóri katô Manama ni plano tun ta mga kamónaan ta sayyan, asal áknganni, igpasóddór din dán tun ta igsalin na mga apostoles asta tun ta mga propeta din ukit katô Ugis Espiritu. ⁶ Ni gó tô plano din na igpasóddór din dán. Mému tanggapán yu tô madigár na bággén ka Manama áknami na mga Judio, su sikiyu na mga ánnà Judio igbánnal pagsík katô Madigár Gulitán tingód ki Cristo. Tô langun ta isakup tun ta sábbad dâd lawa, asta tô langun ta tô bággayan katô ágpulusán na igtandô ka Manama na tumanán din ukit ki Jesu-Cristo.

⁷ Ukit katô kédu ka Manama asta ukit katô katulusan din, inémuwa ikandin na taraulit katô Madigár Gulitán. ⁸ Agad mabbabà dâd é kamánubuwan ku ka tandingán katô langun sakup ka Manama, asal ukit katô kédu din, igsalinna ikandin ébô ulit-ulitán ku tô Madigár Gulitán tun ta mga ánnà Judio na duwán tuu madigár na dì gó katáppánggan na mému dan tanggapán tikud tun ki Cristo. ⁹ Igsalinna ka Manama ébô pénapgáttán ku tun ta langun manubù ni plano na ándà pasóddóri sayyan ka Manama na ígimu katô langun-langun. ¹⁰ Kakalyag ka Manama na ukit katô mga ágpampamaké pasóddórán din gó ôd kadakállan katô kapandayan din tun ta langun pangulu asta mga duwán katulusan tun ta

kawang-awangan. ¹¹ Ni dán gó tō igiplano din sayyan tō ándà pa imuwi ni banuwa, asta igtuman din dán ukit ki Jesu-Cristo na Áglangngagán ta.

¹² Ukit katô iglumu i Cristo asta ukit katô kapamaké ta kandin, ándà máddang ta na padani tun ta Manama su tanggapán ki gó ikandin. ¹³ Purisu yakó ágsungkù tingód katô mga kahirapan na inókitan ku, su ilumu ni para katô kadigárran yu.

Tô ginawa i Cristo áknita

¹⁴ Atin ka ágpanámdámma tingód katô madigár plano katô Manama áknita, áglingkóódda asta ágdasalla tun ta Ámmà Manama. ¹⁵ Sikandin gó tō Ámmà na igtikudan katô langun panaligan tun ta langit asta mga manubù nit banuwa. ¹⁶ Ágdasalla tun ta matulus Manama na duwán dakál ginawa na dì katáppángngan ébô bággayan kó katô kabákkárran asta kasarig katô kapamaké yu ukit katô Ugis Espiritu. ¹⁷ Mólà pa ka inalayun móddô si Cristo tun ta pusung yu tingód katô kapamaké yu kandin. Ágdasalla ébô tō gunayan katô áglumun yu tō dakál ginawa yu tun ta Manama. ¹⁸ Mólà pa ka makagpát kó asta tō langun ka duma mga sakup katô Manama ka ándin tō tuu kadakállan katô ginawa i Cristo áknita. ¹⁹ Mólà pa ka kasóddóran yu na dakál tō ginawa i Cristo ákniyu, agad dì yu tuu kagpáttan tō kadakállan katô ginawa din. Atin ka makagpát kód na ágginawaan kó ikandin, mapánnù kó katô kapánnuan ka Manama.

²⁰ Durungán tad tō Manama na ágtabang áknita ukit katô katulusan din. Sikandin tō makému katô sobra pa katô langun na pamuyuán ta asta

panámdámmán ta. ²¹ Mólà pa ka durungán tō Manama ka ándà ágtamanán ukit ákniyu na mga ágpampamaké asta ukit ki Jesu-Cristo. Matuman gó ni!

4

Igpasábbadé ki tun ki Cristo

¹ Purisu igprisowa tingód katô kabánnal ku katô Áglangngagán. Ágpédu-éduwa ákniyu na kailangan madigár tō ágkémun yu na nángngà tun ta Manama na igtawar ákniyu. ² Kailangan pabbabà-babà kó, médu-édu kó asta mallayat é ginawa yu tun ta mga unawa yu. Papasinsiyaé kó, su ukit kani, ágpakitanán yu na ágpaginawaé kó. ³ Ággár-ággár kó asta panayun kó tun ta kapasábbadé yu na tikud tun ta Ugis Espiritu, su inaggát kód na igpasábbadé ukit katô kasunayan. ⁴ Su tō langun ta na mga ágpampamaké igimu ka Manama na sábbad dák lawa, sábbad dák tō Ugis Espiritu na góddô dini áknita, asta sábbad dák tō gimanán tun ta katawar din áknita. ⁵ Sábbad dák tō Áglangngagán ta, sábbad dák tō ágpamakén ta, asta sábbad dák tō gunayan ka kapabunyag ta. ⁶ Sábbad dák tō Manama na Ámmà katô langun. Sikandin tō ágpangulu katô langun, sikandin tō ágtuman katô kakalyag din ukit katô langun, asta sikandin tō góddô tun ta langun.

⁷ Duwán gasa na igbággé i Cristo tun ta tagsábbad-sábbad áknita tingód katô dakál ginawa din. ⁸ Mà katô kagi ka Manama na igsulat, Tô igsadun sikandin tun datas,

Igpid din tō marapung mga igtalu din,

Asta igbággé din tō mga gasa tun ta mga manubù.*

⁹ (Na, ukit kani kagi na, “Tô igsadun sikandin tun datas,” isóddoran ta na iguna pa sikandin igsunnad nit banuwa.† ¹⁰ Sikandin na igsunnad tō igsadun pagsik tun datas ta langit ébô imun din na nángngà tō langun-langun.) ¹¹ Si Cristo tō igbággé kani mga gasa áknita, su duwán igimu din na mga apostoles, duwán mga propeta, duwán mga taraulit katô Madigár Gulitán, asta duwán mga tarapid asta mga taratinurù katô kabánnalan. ¹² Tô gó tō igbággé din para ágkagamit katô mga sakup ka Manama ébô kumasarig tō kapamaké katô langun ta na igpanunggiringan na lawa i Cristo. ¹³ Ukit kani, makému ki pasábbadé tun ta kapamaké asta tun ta kasóddór ta katô Batà ka Manama ébô mému ki na mabákkár, asta makéring tō ágkémun ta katô nángngà ágkémun i Cristo.

¹⁴ Atin ka matuman ni, dì kid méring na mga gabatà. Dì kid méring na barko na ágpiddán ka balud asta áglayapán ka karamag, su dì ki sékót ágkapid katô mga ágtinuruán ka mga katig áglimbung ukit ka bulaló. ¹⁵ Asal tingód katô kapaginawaé ta, kailangan mulit ki gó baling katô kabánnalan. Purisu méring ki gó ki Cristo agad ándin tō áglumun ta. Sikandin tō iring na ulu ta, ¹⁶ asta sikitá tō iring na lawa din. Ukit katô kapid i Cristo áknita, ágpasábbadé tō langun ta, iring na mga bahin ka lawa. Atin ka nángngà tō áglumun katô tagsábbad-sábbad bahin ta asta ágpaginawaé ki, dumakál asta kumasarig ki na mga ágpampamaké

* ^{4:8} 4:8 Salmo 68:18. † ^{4:9} 4:9 Nit banuwa, ó tun dalám ka tanà.

iring na sábbad lawa.

Mantu ágkémun katô mga ágpampamaké

17 Purisu duwán kagin ku ákniyu na tikud tun ta Áglangngagán. Yakó ágpéring katô ágkémun yu tun ta mga manubù na dì ágpamaké katô Manama, su ándà ágpulusán katô mga panámdám dan. **18** Ingittángngan tō panámdám dan su ándà dan ikagpát katô kabánnalan. Igéllé dan katô kantayan na ágbággén ka Manama su ándà gó sóddór dan asta matággas gó tō ulu dan. **19** Ándà dán kayyà dan. Ikataglang dan katô madat mga áglumun dan. Dì dan ágsódô áglumu katô langun klasi ka kadattan.

20 Asal ánnà iring kani tō igtinurù ákniyu tingód ki Cristo! **21** Isóddóran ku na tō ikadinág kó tingód ki Jesus, igtanggap kó katô kabánnalan na igtinurù ákniyu tingód kandin. **22** Purisu sódô kó katô katumán yu katô madat mga kakalyag yu, su tō gó tō taganà ágkémun yu na igdadat ukit katô tapé kakalyag yu na iglimbung ákniyu. **23** Kailangan pamantun yu tō pusung yu asta tō panámdám yu. **24** Igbággayan kó katô mantu ágkémun, su igimu kó ka Manama na mantu iring kandin. Kailangan pakitanán yu gó na igpamantu kód ukit katô áglumun yu na nángngà asta malinis tun ta saruwañ ka Manama.

25 Purisu yakó ágbulaló. Kailangan bánnal gó tō kagin yu tun ta mga unawa yu, su tō langun ta mga bahin tun ta lawa i Cristo.† **26** Yakó ágkapid katô sókó yu ébô dì kó makasalà.§ Sódoi yu tō sókó yu ka dì pa sumalláp tō álló, **27** asta yakó ágbággé ka lugar

† **4:25** 4:25 Ahaán tō Zacarias 8:16. § **4:26** 4:26 Ahaán tō Salmo 4:4.

ki Maibuyan. ²⁸Tô takón kailangan dì dán tumakó. Kailangan lumumu sikandin katô madigár ébô duwán magamit din asta makatabang sikandin katô mga ágkahirapan. ²⁹Yakó gó ágkagi ka madat, asal kailangan madigár dád tô ágkagin yu ébô katabangan tô mga unawa yu, asta kumasarig tô kapamaké katô mga maminág ákniyu. ³⁰Yakó yu ágparanuwi tô Ugis Espiritu ka Manama ukit katô mga áglumun yu, su sikandin gó tô pató na sikiyu tô mga sakup katô Manama ébô kasóddóran yu na matuman gó na tábbusán kó tun ta tapuri álló. ³¹Sódô kód lumu kani langun. Yakó gusig. Yakó sékót ágkaringasa. Yakó ágkasókó. Yakó ágsapà. Yakó ágkagi ka madat. Yakó ágkagi asta áglumu ka madat tun ta duma manubù. ³²Asal kailangan madigár tô lumun yu tun ta mga duma manubù asta pédu-éduwé kó. Kailangan papasinsiyaé kó iring katô kapasinsiya katô Manama ákniyu ukit ki Cristo.

5

Kailangan madigár tô ágkémun yu

¹ Na, su inému kód na mga gabatà katô Manama na ágginawaan din, kailangan makéring kó kandin. ² Agad ándin tô áglumun yu, kailangan ágginawa kó katô mga unawa yu iring katô kaginawa i Cristo áknita, su igbullas gó sikandin áknita asta igmatayan sikandin ébô pasinsiyaan katô Manama tô mga salà ta. Tô inaté si Cristo, iring sikandin na mammut na ágbággén tun ta Manama na makadayó kandin.

³ Mga sakup kó gó katô Manama. Purisu yakó áglayuk katô ánnà ákniyu sawa ó duma, yakó áglumu

katô agad ándin na maripà, asta yakó ágkasabuan katô kaduwánnan ka duma manubù. Kailangan dì kó lumumu kani mga salà ébô ándà makabuyas ákniyu, su dì mému ni lumun katô mga sakup ka Manama. ⁴ Dì mému ka kumagi kó katô maripà ó katô ándà ágpulusán ó katô tamparasà, asal kailangan pasalamat kó baling tun ta Manama. ⁵ Kailangan kasóoddóran yu na dì makahu tun ta pagpangulu i Cristo asta katô Manama tô mga manubù na áglayuk katô ánnà kandan sawa ó duma, tô áglumu katô agad ándin na maripà, asta tô ágkasabuan katô kaduwánnan ka duma manubù. Atin ka ágkasabuan tô manubù, duwán ágmanaman na ágpangadapán din.

⁶ Tingód kani mga linumuwan ka mga manubù, supakan dan ka Manama, su dì dan ágbánnal kandin. Purisu yakó ágkapid katô mga lumimbung pád ákniyu ukit katô ákgagin dan na ánnà madat ni mga lumu ni. ⁷ Purisu yakó gó ágduma kani mga manubù na madat tô áglumun dan. ⁸ Dángngan, duwán kangittángngan tun ta panámdám yu, asal áknganni duwán dán kappawaan yu su igpasakup kód tun ta Áglangngagán. Purisu tô ágkémun yu kailangan makéring katô ágkémun ka mga manubù na duwán kappawaan. ⁹ Su madigár, nángngà asta ágkasarigan tô áglumun katô mga manubù na duwán dán kappawaan. ¹⁰ Ággár-ággár kó ébô makagpát kó ka ándin tô kakalyag katô Áglangngagán na lumun yu. ¹¹ Lili kó katô madat mga lumu na ándà ágpulusán na áglumun katô mga sakup ka kangittángngan. Asal ukit katô madigár ágkémun yu, ágpasóoddór kó na madat tô

mga áglumun dan. ¹² Asal makayayà agad tò ágkagi dd katô mga áglumun dan na inalls. ¹³ Atin ka madigr tò áglumun yu, kagpttan dan na tuu madat tò áglumun dan, ¹⁴ su kappawaan tò langun na ágtaddawan katô kabnnalan. Purisu duwn ágkagin na,

“Atin ka ágtudug ka, lagimmata kad.

Atin ka inat ka, ánn kad,
su kataddawan ka i Cristo.”

¹⁵ Purisu tuu k bant katô ágkmun yu. Yak yu giringi t mga and kapandayan, asal iringi yu t mga manub na duwn kapandayan. ¹⁶ Yak yu gulai t oras yu, asal kailangan lumumu k kat madigr, su marapung gó t mga áglumu ka madat áknganni. ¹⁷ Purisu yak áglumu kat and ágpulusn, asal kailangan kagpttan yu ka ándin t kakalyag kat Áglangngagn na lumun yu.

¹⁸ Yak ágkalasing, su kadattan k dd gó, asal kailangan kapnnuan k kat Ugis Espiritu. ¹⁹ Atin ka ágpalinud k, pasalamat k kat Áglangngagn ukit kat kakanta yu ka mga kagi ka Manama na igsulat, asta ukit kat mga kanta tingd ki Jesus, asta ukit kat mga kanta na tikud tun ta Ugis Espiritu. Kailangan tikud gó tun ta pusung yu t kakanta yu. ²⁰ Agad ándin t kkitan yu, kailangan ágpasalamat k tun ta Ámm Manama, su igpasakup kd kat Áglangngagn ta na si Jesu-Cristo.

Mga sug para kat mga taladuma

²¹ Kailangan pasakup t tagsbbad ákniyu tingd kat karespeto yu ki Cristo.

²² Sikiyu na mga sawa, pasakup kó tun ta ákniyu duma, iring katô kapasakup yu tun ta Áglangngagán. ²³ Tô mama tô ágpangulu katô kandin sawa, iring na si Cristo tô ágpangulu katô mga ágpampamaké, su sikandin gó tô igtábbus katô mga ágpampamaké na igpanunggiringan na lawa din. ²⁴ Purisu kailangan pasakup asta numunug tô mga sawa tun ta kandan duma, iring na kapasakup katô mga ágpampamaké tun ki Cristo.

²⁵ Sikiyu na mga gamama, ginawayi yu tô ákniyu sawa iring katô kaginawa i Cristo katô mga ágpampamaké, su ighbullas gó sikandin áknita asta igmatayan ²⁶ ébô ukit katô kagi ka Manama imun ki malinis tun ta saruhan din, su igurasan kid ikandin ukit katô kabunyag. ²⁷ Igurasan kid ikandin ébô tanggapán ki na mga ágpampamaké iring na bayi na kasalán na tuu madigár ágsállággán su ándà palang buring ó maripà ó agad ándin na madat. Kakalyag ka Manama na tuu ki malinis asta ándà palang salà. ²⁸ Purisu tô mga gamama kailangan gó guminawa katô kandan sawa iring katô kaginawa dan katô kandan sarili lawa, su tô mama na ágginawa katô kandin sawa ágginawa gó katô kandin sarili lawa. ²⁹ Ándà gó palang manubù na ágkaringasa katô kandin sarili lawa, asal ágpakannán din asta ágdóppónan din. Tô gó tô áglumun i Cristo tun ta mga ágpampamaké na igpanunggiringan na kandin lawa, ³⁰ su sikita tô mga bahin tun ta lawa din. ³¹ Mà katô kagi ka Manama,

“Purisu tumanan tô mama katô ámmà din asta katô innà din, asta pasábbadé tô mama

asta tō sawa din. Tō duwa dan mému dán sábbad.”*

³² Tuu gó madigár ni kabánnalan na igpasóddór ka Manama áknita ukit kani kagi din, su ni gó tō panunggiringan tingód ki Cristo asta áknita na mga ágpampamaké. ³³ Asal duwán gó kailangan tumanán katô mga taladuma. Tō tagsábbad-sábbad ákniyu na mga gamama, kailangan ginawaan yu gó tō ákniyu sawa iring katô kaginawa yu katô ákniyu sarili lawa. Asta tō tagsábbad-sábbad ákniyu na mga sawa, kailangan respetowan yu gó tō ákniyu duma.

6

Mga gabatà asta kandan mga ámmà asta innà

¹ Sikiyu na mga gabatà, bánnal kó katô ákniyu mga ámmà asta innà iring katô kabánnal yu katô Áglangngagán, su tō gó tō nángngà lumun yu. ² Ni gó tō una sugù na duwán tandô para katô mga ágbánnal,

“Respetowi yu tō ákniyu ámmà asta innà

³ ébô kumallayat tō kantayan yu nit banuwa.”*

⁴ Na, sikiyu na mga ámmà asta mga innà, yakó yu ágpasókówi tō ákniyu mga gabatà, asal dóppóni yu ukit katô disciplina asta tambag na makadayó katô Áglangngagán.

Mga állang asta mga amo

* **5:31** 5:31 Genesis 2:24.
Deuteronomio 5:16.

* **6:3** 6:2-3 Exodus 20:12;

⁵ Sikiyu na mga állang, tuman yu tō kakalyag katō ákniyu amo nit banuwa. Kailangan respetowan yu sikandan. Kailangan tikud tun ta pusung yu tō katuman yu katō mga sugù dan magunawa katō kabánnal yu ki Cristo. ⁶ Inalayun kó bánnal kandan, ánnà dák róggun ka sumállág dan ákniyu ébô madurung kó. Su mga állang kó gó i Cristo, kailangan tikud tun ta tibuk ka pusung yu tō katuman yu katō kakalyag ka Manama. ⁷ Kailangan malóggód kó áglumu, su ánnà dák manubù tō ágbánnalán yu, asal tō Áglangngagán tō ágbánnalán yu. ⁸ Yakó ágkalingó na agad ándin tō áglumun yu na madigár, duwán gó madigár sulì katō Áglangngagán ákniyu, agad állang kó ó ánnà kó állang.

⁹ Sikiyu na mga amo, kailangan madigár tō kapid yu katō mga állang yu. Yakó áglagaggá kandan, su agad sikiyu asta tō mga állang yu, sábbad dák gó tō Amo yu tun ta langit, asta ándà manubù na ágmusingán din agad ándin tō bónnóng dan.

Mga laniban na ágbággén ka Manama áknita

¹⁰ Na, ni gó tō ágtamanán katō mga ágtinuruán ku ákniyu. Su igpasábbad kó tun ta Áglangngagán, pasarig kó gó ukit katô katulusan din. ¹¹ Gamit yu tō langun laniban na ágbággén katô Manama ébô makatu kó katô mga kapókit asta limbung i Maibuyan. ¹² Su ánnà mga manubù tō mga usig ta, asal tō madat mga espiritu asta tō ágharì na dì ágkitanán, tō duwán katulusan ka kangittángngan nit banuwa, asta tō madat mga espiritu tun ta kawang-awangan. ¹³ Purisu kailangan gamitán

yu tō langun laniban na ágbággén katô Manama ákniyu ébô makatu kó katô mga usig ta ka dumunggù tō álló ka kadattan. Purisu atin ka mapángnga dán tō langun kani, makita na ándà kó gó katalu. ¹⁴ Purisu taganà kó iring na sundalo na ágtaganà katô gira. Gamit yu tō kabánnalan iring na sinturon. Gamit yu tō katanggap ka Manama ákniyu na nángngà tun ta saruwan din iring na putó salimbutung tun ta kagpa. ¹⁵ Gamit yu iring na sapatus tō kataganà yu na mulit-ulit katô Madigár Gulitán tingód katô kasunayan na ágbággén katô Manama. ¹⁶ Gamit yu tō kapamaké yu ki Cristo iring na kalasag ébô dì kó kasugatan katô iring na mga ágrágrág na ágpanaán i Maibuyan tun ákniyu. ¹⁷ Gamit yu tō katábbus ka Manama ákniyu iring na putó sambariro. Gamit yu tō kagi ka Manama na igbággé katô Ugis Espiritu iring na kampilan. ¹⁸ Agad ándin tō dumunggù ákniyu, yakó ágsódô na ágdasal ukit katô katulusan katô Ugis Espiritu. Patannáb kó asta panayun kó tun ta kadasal para katô langun sakup ka Manama. ¹⁹ Dasal kó pagsik para kanak ébô bággayanna ka Manama katô nángngà mga kagi na ándà máddang ku ka mulit-ulitta katô Madigár Gulitán na ándà pasóddóri sayyan. ²⁰ Inémuwa na ágsuguánnán katô Manama ébô mulit-ulitta kani Madigár Gulitán, asta tō gó tō gunayan na igprisowa áknganni. Asal dasal kó para kanak na diya kumataló asta nángngà tō kólit-ólit ku.

Ágtamanán kani sulat

²¹ Si Tiquico tō kataladi na ágginawaan. Ágkasarigan sikandin na kadumaan ku na ágtuman

ka kakalyag katô Áglangngagán. Atin ka dumunggù sikandin diyan ákniyu, ultán din tô inému kanak dini. ²² Purisu pasadunán ku sikandin diyan ákniyu ébô makasóddór kó tingód áknami, asta ébô pabákkárrán tô pusung yu.

²³ Mga kataladi, mólà pa ka duwán kasunayan yu asta duwán ginawa yu tikud tun ta Ámmà Manama asta Áglangngagán na si Jesu-Cristo ukit katô kapamaké yu. ²⁴ Mólà pa ka tabangan ka Manama tô langun yu na ággina wa katô Áglangngagán ta na si Jesu-Cristo ukit katô ginawa na ándà ágtamanán.

**Kagi Ka Manama
New Testament and Shorter Old Testament in
Tagabawa**

copyright © 2004 Wycliffe Bible Translators, Inc.

Language: Tagabawa

Translation by: Wycliffe Bible Translators, Inc.

Copyright Information

© 2004, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

New Testament and Shorter Old Testament

in Tagabawa

© 2004, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

**PDF generated using Haiola and XeLaTeX on 11 Nov 2022 from source files
dated 29 Jan 2022**

bb1b22b0-020d-5555-b0e4-517943a1ed25